

ALAHADY fahatelo PAKA - TAONA B



« Araka ny voasoratra, dia tsy maintsy hijaly i Kristy sy hitsanganako velona amin'ny andro fahatelo » (Lk. 24: 46)

Ry Kristianina havana, tamin'ny Alahady lasa isika nibanjina ny vokatry ny Paka dia ny famindrampon'Andriamanitra miara-belona amintsika tsy iza fa i Jesoa Kristy izay nizara ny fiadanana vokatry ny famindrampon'Andriamanitra. Amin'izao Alahady fahatelo ny Paka izao dia any Vohipeno ny fo amam-panahintsika tsirairay, miombona amin'ny diosezin'i Farafangana, miombona amin'ny Eglizy eran'i Madagsikara, miombona amin'ny Eglizy eran-tany mankalaza sy misaotra an'Andriamanitra satria mibaribary eo anivon'ny fiainantsika tokoa izany famindrampon'Andriamanitra izany.

Vakiteny I : Asa 3, 13-15. 17-19

Tononkira : Salamo 4

Vakiteny II : 1 Jo. 2, 1-5a

Evanjely : Lk. 24, 35-48

Ny voninahitr'Andriamanitra no ankalazaintsika amin'ny fanambarana olontsambatra an'i Ramose Lucien Botovasoa. Manana modely isika izao ka miara- misaotra sy mankalaza ny famindram-po sy ny fitiavan'Andriamanitra nasehony tamin'ny

alalan'olontsambatra. Izany indrindra no ambaran'ireo vakiteny telo atolotry ny Eglizy androany. Tamin'ny Alahadin'ny Paka isika nihaino ny tantaran'ireo mpianatra avy any Emaosy nisehoan'i Jesoa teny an-dàlana ary niova ny fon'izy ireo, nirehidrehitra rehefa nanazava ny Soratra Masina tamin'izy ireo I Jesoa na dia tsy nahafantatra azy azy ireo mpianatra. Rehefa nisokatra ny masom-pinoany ka nahafantatra fa ny Tompo no teo

anivony dia lasa nihazakazaka nankany Jerosalema ka nitantara ny zava-niseho tamin'ireo mpianatra izay nihidy tao an-trano noho ny fahatahorana ny Jody. Mitohy izany tantara izany amin'ny Evanjely androany izay manambara fa niseho tamin'ireo mpianany tafavory i Jesoa ary nanambara fa Izy no miaraka amin'izy ireo. Manambara koa izany fa I Jesoa miaraka amintsika, I Jesoa eo anivontsika. Mitohy hatramin'izao ny tantara ka eo anivontsika, miara-dalana amintsika I Jesoa. Izany no dikany ny fanambarana Olontsamabatra. Izany no ambara any Vohipeno amin'izao fotoana izao, miaraka amintsika tokoa I Kristy. Araky ny averimberintsika matetika "Ady sady Dia" ny fiainantsika ary niseho tamin'ny fiainan'i Lucien Botovasoa koa ny fandalovana amin'ny fisedrana sarotra indrindra dia ny famonoana azy ka naha maritiry azy, tsy natahotra izy fa nifikitra tamin'i Kristy izay nataony ho loharanom-piainana. Nino ny famindrampon'Andriamanitra i Lucien Botovasoa ka tsy natahotra ary nanaiky ny ho faty tapan-doha. Izany koa no ambaran'i Jesoa tamin'ireo mpianatra rehefa niseho tamin'izy ireo izy "Aza matahotra fa izaho ihany ity", velona aho ary miara-belona amiko ianareo, tsy matoatoa aho fa tena olona velona tokoa. Tenin'i Kristy izany ka tsara ho an-tsaintsika lalandava na dia misedra ny mafy azy tahaka ny niseho tamin'i Lucien Botovasoa. Mahatonga antsika ho EOV eglizy olona velona ny fifikirantsika sy ny finoantsika fa eo amintsika mandrakariva i Kristy satria velona miaraka amintsika Izy Kristy ary mahatonga ny fiainantsika tsy misy efitrefitra. Ohatra velona ho antsika ny fiainan'i Lucien Botovasoa, izay nahay nampitraotra ny finoana sy ny fiainana andavanandro.

Ry Kristianina havana, matoa velona eo anivontsika i Jesoa satria velona ny finoantsika ka iainantsika izay inoantsika eo anivon'ny fiainantsika andavanandro i Jesoa. Nilaza i Kristy fa tsy maintsy hijaly izy kanefa hitsangan-ko velona.

Hitantsika tamin'ny fiainan'i Lucien Botovasoa izany, tsy maintsy miatrika ny sedra isankarazany isika kanefa tsy maintsy hitsangan-ko velona koa izy ary izany no ambaran'ny Paka.

Ambaran'ireo Apôstôly hatramin'ny voalohany izany Vaovao Mahafaly izany, hitantsika izany amin'ny vakiteny voalohany amin'ny boky mitantara ny Asan'ny Apôstôly manambara ny fahasahian'i Piera mijoro sy manambara fa i Jesoa dia nitsangan-ko velona tokoa ary izahay no vavolombelon'izany. Nijoro ho vavolombelona koa i Lucien Botovasoa ka tsy natahotra na dia niafara tamin'ny fanapahan-doha azy aza izany.

Ny vakiteny voalohany manambara fa satria tsy fahalalàna no nanaovanareo izany, *"Ary ankehitriny, ry hava-malala, fantatro tsara fa ny tsy fahalalana no nanaovanareo izany, toy izany koa ireo lehibenareo, fa notanterahin'Andriamanitra tamin'izany kosa izay voalazany rahateo amin'ny vavan'ny mpaminany rehetra, fa hijaly i Kristy. Koa mivaloza, ary mibebaha, mba hovonoina ny helokareo"*.

Lucien Botovasoa koa dia nilaza tamin'ny mpanjaka Tsimihono fa tsy fahalalàna ny ~~lalan-komban~~ no nanomezany baiko hamonoana azy fa ho tonga ny fotoana hahafantarany ny famindramon'Andriamanitra ka hibebaka izy mpanjaka ka ~~ary~~ hivalo.

Izany tokoa no niseho satria talohan'ny ho faty dia nibebaka ny mpanjaka Tsimihono. Ny tantara nataony tamin'i Mompera nanao batemy azy (1964) ka nanambarany fa Lehilahy Marina i Lucien Botovasoa no nanahatonga ny pretra tamin'izay fotoana izay nanomboka ny fanadihadihana mikasika an'i Lucien Botovasoa. Mampahatsiaro ny teny nataon'ilay kapiteny ao amin'i Mt 27, 54 mikasika an'i Jesoa: "Tena Zanak'Andriamanitra tokoa..."

Aoka àry hararaotintsika izao fotoam-pahasoavana hankalazana ny fanambarana olontsambatra an'i Lucien Botovasoa izao, fotoana fibebahana izao ka manatona isika handray an'i Kristy fa izy no làlana hitondra antsika amin'ny tena marina sy ary Izy tokoa no fototry ny fiainantsika satria Izy no làlana sy fahamarinana ary fiainana, izy no hahazoantsika fiadanana.

Milaza i Md Paoly fa ny fibebahana no mitondra antsika amin'ny tena fiainana, marina fa ny fahotana misarika antsika mandrakariva amin'ny fakam-panahy izay mitonda antsika mandrakariva hanalavitra an'Andriamanitra. Md Joany ao amin'ny vakiteny faharoa manambara fa eo anivontsika i Jesoa ka na dia maro aza ny heloka vitantsika na dia maro ny mety manapotika antsika dia aoka hanararaotra izao fotoana izao isika mba hialantsika amin'ny fiainana tsizarizary ka hidirantsika amin'ny fiainambaovao hahatonga antsika ho Taranaka Mpanorina.

Ry Jesoa Kristy zokinay ô ampianaro izahay mba hahay hanararaotra izao fotoana izao, hahay hiova tokoa ka hanana masom-pinona anay izahay ka hiova ny maso fijerinay, hiova tokoa ny fonay ka hahita Anao na dia eo anivon'ireny fahasarotan'ny fiainana ireny aza. Hiova tokoa izahay tahaka an'i Lucien Botovasoa izay nilaza hoe "izao aho vao mahalala an'i Kristy. Aoka anie izahay hahalala an'i Kristy ka hifamela heloka sy hahay hifandray tsara mba hikatsaka mandrakariva ny marina, hampanjaka mandrakariva ny rariny sy ny hitsiny eo amin'ny fiainanay. Ho eo aminay mandrakariva ny fifankatiavana nampianarinao ka hahazo ny tena fiadanana izahay. Hanjaka amin'ny firenenay anie ny fiadananao ka i Masina Maria Reny mpiaro anay hanampy anay sy hivavaka ho anay, ary Lucien Botovasoa Olontsambatra hivavaka ho anay mba hahafahanay manaraka ny dia nataony ka hahatonga anay ho tena vavolombelonao, hahafoy ho anao izahay amin'ny ataonay rehetra, ho olona tia vavaka izahay, ho olona mifanombo hitady ny soa sy hitady mandrakariva ny soa iombonana amin'ity firenanay ity. Amen

Mompera Arseveka Mgr Benjamin Ramaroson